

Isnin, 16 March 2020 | 1:37pm



Tinjauan di beberapa farmasi di sekitar Kuala Lumpur mendapati topeng muka kehabisan stok berikutan wabak COVID-19. - NSTP/Eizairi Shamsudin

## COVID-19: Hospital swasta kurang bekalan topeng

Oleh Suzalina Halid  
suzalina@bh.com.my

**KUALA LUMPUR:** Hospital swasta di negara ini didakwa mengalami kekurangan bekalan topeng penutup hidung dan mulut serta peralatan perlindungan diri (PPE) dalam berdepan situasi mengawal wabak coronavirus (COVID-19) di kemudahan jagaan kesihatan itu.

Presiden Persatuan Hospital Swasta Malaysia (APHM), Datuk Dr Kuljit Singh, berkata situasi kekurangan bekalan itu disifatkan serius kerana ia dikhawatiri mampu memberi kesan buruk kepada keselamatan pesakit dan kakitangan perubatan yang mengendalikan kes COVID-19.

Sehubungan itu, katanya Kementerian Kesihatan bersama Kementerian Perdagangan Dalam Negeri dan Hal Ehwat Pengguna (KPDNHEP) diminta berganding bahu dalam menyelesaikan masalah ini.

"Terdapat hospital swasta yang tidak dapat bekalan sumber terhadap topeng jenis tiga lapis dan N95 serta PPE kepada pesakit dan kakitangan perubatan yang bertugas.



“Hospital swasta juga cuba mendapatkan bekalan peralatan itu daripada pengilang tempatan yang mengeksportnya daripada luar, ” katanya dalam kenyataan, di sini hari ini.

APHM yang ditubuhkan sejak 1972 ini mempunyai 140 keahlian yang rata-ratanya membabitkan hospital swasta yang terkemuka.

Sebelum ini, tinjauan dibuat BH di beberapa farmasi di Lembah Klang mendapati bekalan topeng penutup hidung dan mulut kehabisan stok sejak akhir Januari lalu.

Walaupun ada beberapa buah farmasi yang mendapatkan bekalan topeng itu secara kecil-kecilan namun ia umpama pisang goreng panas apabila boleh habis terjual dalam hanya tempoh satu jam.

Pada masa sama, Dr Kuljit berkata, sudah tiba masanya jalinan kerjasama antara kemudahan jagaan kesihatan awam dan swasta dipertingkatkan dalam mencari strategi terbaik sepanjang berdepan penularan wabak COVID-19 di negara ini.

Katanya, APHM sendiri menerima sokongan daripada majoriti ahlinya untuk jalinan kerjasama ini dalam meningkatkan aspek pengurusan kawalan terhadap wabak ini.

“Kita akan memberikan cadangan bagaimana cara terbaik supaya kerjasama ini boleh dilakukan dan ia akan disampaikan kepada pihak Kementerian Kesihatan, ” katanya.

